

Diadomingo awor

Concierto Dominical Donny Laclé na Biblioteca Nacional

Percura pa bo t'ey



TUR amante di Concierto Dominical Donny Laclé, y pueblo di Aruba en general ta keda invita pa e concierto di luna di maart 2017. Manera custumber, esaki lo tuma luga na Biblioteca Nacional, diadomingo awor, 26 di maart.

E programa pa e diadomingo aki ta manera ta sigui.

Pa 11'or di mainta e duo Sweet Inspiration cu ta consisti di Jerry Diaz y Ana Diaz lo habri e concierto. Sweet Inspiration ta un duo cu ta toca den hotelnan na Aruba, pero cu tambe ta haci diferente presentacion durante eventonan cultural y tambe na fiestanan priva. Sweet Inspiration lo deleita tur presente cu un variacion di musica/canticanan tipico y moderno.

E siguiente presentacion ta den man di El Duque Victor Samuel, kende ta un cantante cu un trayectoria internacional hopi largo. Apenas dos siman pasa el a batisa su CD nobo, cu un variacion di cantica y ritmo, yama: "Joyas". Diadomingo nos por disfruta di algun de e canticanan aki, compana entre otro riba piano pa Vivian Lampe.

Pa sera e concierto lo tin actuacion di Grupo Tipico Un Brindis bou direccion di Vicente Tromp. 8 integrante, tocando sinfonia di boca, piano cuarta, bajo, conga, drum y percusion lo brinda e publico un variacion di cantica cu lo kishiki e pianan.

Entrada ta gratis, pero durante pausa ta pasa rond un caha di glas, den cua por haci un donacion.

Tur aña, na luna di november Fundacion Donny Laclé ta otorga diferente estudiante di musica un Scholarship pa yudanan desaroya nan talento musical.

Un y tur ta bon bini na Concierto Dominical Donny Laclé cu ta cuminsa exactamente 11'or di mainta y lo termina pa 1'or di merdia.

< *Continua di pagina 18*

Despues cu e asunto aki a hiba na un acuerdo cu Hulanda cu lo bin supervision di Cft, a bin sali na cla con serio situacion financiero di Aruba ta di berdad.

PESO DI DEBE SUMAMENTE HALTO

Mientrastanto e debe total di Aruba a surpasa Afl. 4 biyon. Pa cada habitante esey ta nifica un peso riba su lomba di Afl. 36.000,-.

Na momento cu lo termina e proyectonan PPP na fin di 2018, e debe aki lo aumenta na Afl. 5 biyon, locual ta nifica Afl. 45.000,- pa persona. Esaki ta hopi mas halto cu e debe pa habitante di Puerto Rico cu ta Afl. 37.000,-.

Como cu Puerto Rico mes no tin manera pa sali for di e abismo financiero cu e Gobiernonan consecutivo a crea den curso di hopi aña, Gobierno di EEUU a impone supervision financiero.

E medidanan cu mester tuma a hiba na reduccion substancial di e cantidad di empleado publico, di salario, di gasto (y pues di servicio) di salubridad publico, di cuida social, di calidad di enseñansa, etc. E situacion socio-economico a deteriora asina hopi cu masha hopi ciudadano a opta pa emigra for di Puerto Rico.

CONTINUACION DI ACTITUD DI CABES DURO PA MOTIBO ELECTORAL

Mescos cu e Gobiernonan consecutivo di Aruba a negligisha aña aden, aña afo tur advertencia y conseho di tur e instancianan local y internacional, e ta sigui cu e actitud aki pa cu CAft.

Hulanda y Aruba a acorda cu Aruba lo baha su fayó presupuestal segun un plan hancra den ley (LAft). Ademas a palabra cu si riba dje lo logra e transicion pa finansa publico duradero, Hulanda lo yuda Aruba haya prestamo cu interes abou pa scapa (hopi) placa di pago di interes.

Locual lo scapa na interes, lo uza pa paga debe. Pa logra finansa duradero, sin mas lo mester baha e cantidad di personal consid-

erablemente. Esaki ta algo cu nos propio instancianan RvA, ARA, SER, ademas di CBA y IMF, CF y NCPF ya caba a canta durante varios decada.

Si no, CAft a premira ya caba na 2014 (!) cu desde 2018 e gastonan lo supera e entradanan atrobe. Consecuentemente e debenan lo sigui crece...

Gobierno no ta tene su mes na su propio palabracion y asina ta perhudica henter comunidad di Aruba

Te awor, Aruba a logra di cumpli cu e prome palabracion tocante bahamento di e fayó presupuestal, aunke sea cada bes a base di entrada adicional incidental y triki di contabilidad.

Pero di ningun manera Gobierno di Aruba a cumpli cu su propio intencion pa cu e di dos palabracion, esta di baha e gastonan di personal cu 5% pa aña.

Al contrario, cu un excepcion hopi insignificativo, e gastonan di personal a sigui subi tur aña. Pa complica e asunto aki, ta premira cu e añanan benidero e aumentonan di gasto di personal lo ta hopi mas substancial pa motibo di e acuerdo cu Gobierno y sindicato di empleado publico a sera na 2014. Como tal, Aruba no a, ni lo cumpli cu e di dos exigencia di CAft y su propio palabracion. Consecuentemente Aruba ta core e riesgo grandi cu e no lo bin na remarca pa 'prestamo barata' cu sosten di Hulanda.

Segun FGCA, haciendo esaki, Gobierno di Aruba ta sacrifica interes di pueblo di Aruba pa motibo electoral. Al fin y al cabo pueblo di Aruba lo paga un prijs hopi halto p'e 'maneho' aki.

Pa mas informacion, por lesa e raportnan completo tocante personal y e administracion financiero riba e website di FGCA:

www.bongobernashonaruba.org bou di e cabes di 'Nos investigashon'. P'esnan cu no kier lesa e raportnan completo, por lesa un recapitulacion ('Abstracto') di e raportnan.